

## KOMISAUN EKONOMIA NO DEZENVOLVIMENTU

---

### RELATORIU VIZITA FISKALIZASAUN KOMISAUN D IHA SUKU LEIMEA SORIN BALU, POSTU ADMINISTRATIVU HATOLIA NO SUKU DUKURAI POSTU ADMINISTRATIVU LETEFOHO, MUNISIPIU ERMERA

#### I. INTRODUSAUN

##### 1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala'ó vizita fiskalizasaun bazeia ba art.<sup>o</sup> 92<sup>o</sup>, art.<sup>o</sup> 95<sup>o</sup>, n.<sup>o</sup> 3 alínea e), kombinadu ho art.<sup>o</sup> 145<sup>o</sup> n.<sup>o</sup> 3) husi Konstituisaun RDTL, no mos bazeia ba art.<sup>o</sup> 35<sup>o</sup> alínea c), kominadu ho art.<sup>o</sup> 79<sup>o</sup> alínea f) husi Rejimentu Parlamentu Nasional.

Vizita ne'e bazeia ba planu atividade ba tinan 2020 ne'ebe koalia kona ba vizita lokal no mos bazeia ba deliberaun ne'ebe komisaun foti iha loron 23 fulan janeiru 2020 no iha loron ne'e kedas komisaun hato'ó pedidu autorizasaun ba Prezidente Parlamentu Nasional no tuir mai hetan despachu iha loron 24 fulan janeiru 2020.

Haktuir ba despachu refere, iha loron 29 janeiru to'ó 1 fevereiru 2020, komisaun realiza vizita fiskalizasaun iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera ho intensaun atu hare no rona diretamente rezultadu husi implementasaun projetu sira iha reijaun refere.

##### 1.2. Area Fiskalizasaun

Delegasaun halo fiskalizasaun ba area ne'ebe mak kabe ba kompetensia Komisaun Ekonomia no Dezenvolvimentu, hanesan: MAP, SEFOPE, MTCI, Ambiente no Ko'operativa, maibe komisaun ba hare área sira ne'ebe identifika ona hanesan: Vizita Grupu Plantasaun Bunilha iha Suk Leimea Sorin Balu, Postu Administrativu Hatolia no Vizita Estatua Cristo Liurai Cailit Lau, iha Suku Dukurai, Postu Administrativu Letefoho.

##### 1.3. Métodu Fiskalizasaun

Métodu ne'ebe komisaun uza iha fiskalizasaun ne'e mak liu husi diálogo ho lideransa lokal sira liu husi reuniaun. Depois reuniaun membru komisaun ba terenu hodi halo observasaun direta ba konstrusaun no mos koalia direta ho populasaun sira. Depois observasaun komisaun reuniaun hodi halo avaliasaun ba dados ne'ebe iha molok aprova.

## KOMISAUN EKONOMIA NO DEZENVOLVIMENTU

---

### 1. Enkontru

Delegasaun hasoru malu ho autoridade lokal no comunidade sira.

### 2. Observasaun direta

Hare projetu fiziku, koalia ho agrikultor sira no rona comunidade nia lamentasoens.

### 3. Análiza

Cross check dados ne'ebe hetan husi vizita, liga ba ezekusaun orsamentu no dados ne'ebe mai husi governu, hodi hatene kona ba efisiensia no efikasias ezekusaun orsamentu, atu hatene kona ba balansu entre despezas no beneficiariu sira, no atu sukat meta política kona ba retornu ekonómiku.

### 1.4. Objetivu Vizita

Objetivu husi vizita fiskalizaun ne'e:

1. Atu hare efisiensia no efikasias iha ezekusaun orsamentu jeral estadu bazeia ba kumprimentu lei no kualidade obra;
2. Rejista no identifika problema ne'ebe iha, relaciona ho ezekusaun orsamentu (balansu ba beneficiariu sira no osan ne'ebe gasta);
3. Atu hare direktamente prosesu no progressu konstrusaun husi projetu no política implementasaun projetu.

### 1.5. Delegasaun

Delegasaun Komisaun D ne'ebe hola parte iha vizita fiskalizaun ne'e kompostu husi deputadus, teknikus no motoristas hanesan tuir mai:

- |   |                   |                 |
|---|-------------------|-----------------|
| 1. Deputada Virginia Ana Belo             | (Prezidente)      | Xefe Delegasaun |
| 2. Deputadu Ricardo Baptista              | (Vice-Prezidente) | Membru          |
| 3. Deputada Olinda Guterres               | (Sekretaria)      | Membru          |
| 4. Deputadu José Virgílio F. Ferreira     |                   | Membru          |
| 5. Deputadu Antoninho Bianco              |                   | Membru          |
| 6. Deputadu António do Santos             | ''55''            | Membru          |
| 7. Deputadu Alexandrino C. da Cruz        |                   | Membru          |
| 8. Deputada Regina Freitas                |                   | Membru          |
| 9. Deputadu Mariano Assanami Sabino Lopes |                   | Membru          |

*Relatoriu Vizita Fiskalizaun Komisaun D, iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera*

## KOMISAUN EKONOMIA NO DEZENVOLVIMENTU

---

10. Teknikus no Motoristas

### II. REZULTADU ENKONTRU

#### 2.1. Informasaun husi xefe Suku Leimea Sorin Balu

Xefe suku Leimea Sorin Balu, señor Leonel dos Santos iha introdusaun haktuir katak ohin loron orgulho bo'ot simu ita nia bainaka especial sira mai husi Parlamentu Nasional, liu husi komisaun D ne'ebe trata ba asuntu ekonomia no desenvolvimento mai iha suku Leimea Sorin Balu. Xefe suku akresenta liu tan katak suku ida ne'e iha tempu okupasaun mai to'os era uku nan izoladu tebes, hafoin liu husi produitu baunilha ikus mai halo suku ida ne'e naran bo'ot no konhesidu iha Timor Leste.

Iha oportunidade ida ne'e, xefe suku relata kona ba dados populasan no área geograficamente suku Leimea Sorin Balu. Suku Leimea Sorin Balu iha postu administrativu tolu nia klaran hanesan postu administrativu Atsabe, postu administrativu Letefoho no postu administrativu Hatolia. Area suku Leimea Sorin Balu ho nia luan no naruk 11,970 kilometru kuadradu. Husi parte lorosa'e baliza ho suku Hatugau, postu administrativu Letefoho; parte tasi mane baliza ho suku Leimea Leten, postu administrativu Atsabe; parte loro monu baliza ho suku Leimea Kraik, postu Administrativu Hatolia; no parte tasi fetu baliza ho suku Koliata-Leotelu, postu administrativu Hatolia. Suku Leimeia Sorin Balu iha aldeia rua hanesan aldeia Brug Bou no aldeia Leodato.

Total populasan iha 782 ne'ebe kompostu husi mane iha 382 no fetu iha 399, la eskola iha 397, eskola remata iha 80, eskola sekundaria iha 42, bacharelato iha 4, licenciatura iha 10, mestrado iha 1, doutor iha 1, PNTL iha 5 no FDTL iha 1.

#### 2.2. Informasaun husi representante xefe grupu baunilha

Señor Celestino Mascarinas haklaken katak produitu baunilha tama iha suku Leimea Sorin Balu hahu iha tinan 2004, liu husi señor Baltazar Martins ne'ebe ho hanoin diak hodi lori fini baunilha mai kuda iha suku ida ne'e no iha momentu neba nia rezultadu lori ba fan kilograma ida \$3.00 dolar. Hahu husi neba mak agrikultor sira kontinua kuda nafatin produitu ne'e, ho nune'e iha fulan marsu tinan 2012 señor Celestino Mascarinas nudar agrikultor ba hasoru diresaan Plantas Industriais no Agro-Comercio (DNPI-AC), iha Ministeriu Agrikultura no Peskas hodi hato'os informasaun kona ba sira nia intensaun atu hakiak produitu baunilha, tanba sira iha fini rasik ne'ebe kuda iha sira nia to'os. Ho

*Relatoriu Vizita Fiskalizacao Komisaun D, iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera*

## KOMISAUN EKONOMIA NO DEZENVOLVIMENTU

---

nune´e iha momentu neba kedas parte DNPI-AC atende urjente hodi oriente equipa tekniku tun ba terenu hodi observa direta fatin sira ne´ebe mak kuda tiha ona baunilha no mos fatin seluk ne´ebe mak atu kuda tan. Liu husi observasaun refere hatudu katak area refere serve duni atu kuda produdu baunilha, nune´e iha momentu neba implementa uluk hektares rua hanesan pilotu.

Situasaun iha tempu neba difisil tebes, husi postu Administrativu Letefoho ba suku Leimea Sorin Balu kondisaun estrada la permiti, maibe tekniku husi parte DNPI-AC konsege to´o duni hodi realiza program refere ho susesu.

Ho susesu ne´ebe iha mak agrikultor sira hola inesiativa rasik hodi hari´i grupu baunilha ho naran **“GREEN BALISBOH”** (*Baunilha Leimea Sorin Balu Hadomi Matak*). Grupun ne´e hari´i iha loron 27 abril 2012, ho xefe grupu mak seˆnor Baltazar Martins no sekretariu mak seˆnor Celestino Mascarinhas ho membru hamutuk nain 12.

Objetivu husi grupu ida ne´e mak hakarak hasai sira nia suku husi nakukun ba naroma liu husi dezenvolvimentu plantasaun baunilha ho adopta sistema organiku.

Ho objetivu ne´ebe klaru no fo influensia maka´as ba agrikultor sira seluk, ikus mai comunidade suku Leimea Sorin Balu hakarak integra ba grupu ida ne´e ho hanoin ida no hakarak ida deit atu dezenvolve produdu baunilha ne´e ba oin.

Husi sira nia badinas ho pratika ne´ebe aplika lor-loron iha to´os baunilha ne´ebe fo influensia ba agrikultor sira husi suku vizinhu sira ho voluntariu ba partisipa.

Iha tinan 2015 suku Hatugau, postu Administrativu Latefoho hato´o proposta hakarak involve iha programa baunilha, no ikus mai agrikultor suku refere implenta duni ho luan ´area heksres rua iha momentu neba. Ho nune´e to´o iha tinan 2017 expande ona to´o hektares 23 ba iha suku Limea Sorin Balu no suku Hatugau.

Total agrikultor ne´ebe sai hanesan beneficiariu atual husi programa ida ne´e hamutuk nain 160 mai husi suku Leimea Sorin Balu, postu administrativu Hatolia iha 142, ho luan ´area baunilha 21 hektares no suku Hatugau, postu administrativu Letefoho iha ema 12 ho luan ´area baunilha 2 hektares.

---

## KOMISAUN EKONOMIA NO DEZENVOLVIMENTU

---

### 2.3. Informasaun husi representante grupu agrikultor baunilha

Señor Cipriano Mascarinhas fo sai katak setor agrikultura iha suku ida ne'e potensial tebes iha área plantasaun ho variedade mak hanesan: baunilha, pimenta, kakau, maek, forerai, inklui mos plantasaun sira ne'ebe ho rendimentu ekonomiku ki'ik ne'ebe mak durante ne'e agrikultor sira hetan hodi sustenta ba vida moris lor-loron, mas ohin loron suku Leimea Sorin Balu marka história foun ida ba vida mudansa ne'ebe konhesidu ho naran baunilha sai mos nudar exemplu ida ba munisipiu hotu iha Timor Leste. Agrikultor sira sente kontente tebes ho vizita komisaun D hanesan vizita ba dahuluk hodi mai hare no rona halerek sira, tanba agrikultor sira iha boa vontade bo'ot ba servisu iha área plantasaun hirak ne'ebe temi ona, tanba ho produitu baunilha nia resultadu ne'ebe bo'ot kada kilograma \$40-\$50 dolar.

Tan ne'e, representante ne'e sujere atu konsidera pontu importante sira ba iha produitu baunilha mak hanesan: hare ba presu baunilha iha merkadu internasional no nasional ho presu ne'ebe justu tuir estandar internasional; Difini presu fini/stek baunilha ho montante \$2.50 centavos (dólar rua limanulu) no mos husu atu hari'i sentru viveiros ho sentru processamento baunilha iha suku Leimea Sorin Balu.

Problema ne'ebe agrikultor sira infrenta mak hanesan be'e, liu-liu iha tempu bailoron be'e ba aihoris la suficiente.

Alende ne'e, iha mos problema seluk ne'ebe ható'o mak kona ba eletrisidade ne'ebe mak suku tomak seidauk asesu ba eletrisidade, nune'e mos estrada liga ba suku vizinhu hanesan suku Koliata no suku Leimea Kraik seidauk.

### III. INTERVENSAUN HUSI KOMISAUN D

Hafoin rona tiha preokupasaun no halerek sira husi autoridade lokal no representante agrikultor sira, tuir mai Prezidente Komisaun D, deputada Virgínia Ana Belo nudar xefe delegasaun iha intrudusaun haktuir katak vizita ne'e bazeia ba informasaun ne'ebe levanta husi señor deputadu António do Santos ``55`` nudar membru komisaun D, ne'ebe husu atu komisaun D ba vizita fatin baunilha, entaun ho informasaun refere liu husi reuniaun komisaun nian delibera hodi ohin komisaun D to'o duni iha fatin ida ne'e hodi hare direktamente baunilha mak ida ne'ebe ho nia modelu no fuan mak hanusa.

## KOMISAUN EKONOMIA NO DEZENVOLVIMENTU

---

Objetivu prinsipal hanesan deputadu/a iha kna´ar importante ida mak tenki mai halo fiskalizaasaun. Fiskalizaasaun ne´ebe halo refere ba iha obra sira ne´ebe mak governu halo, tanba parlamentu nasional mak aprova osan kada tinan hodi fiskaliza obra sira ne´e halo diak ka lae, se halo la diak, ne´e hotu sei rekomenda ba governu, maibe parte komisaun D nian hakarak mak rona barak liu husi ita bo´ot sira kona ba preokupasaun no lamentasaun sira ne´ebe infrenta hodi nune´e hato´o nafatin ba governu, se governu ida ne´e la halo no governu tuir mai sei halo, mesmu governu troka ba mai, maibe estadu no nasaun ida ne´e existe nafatin. Entaun ohin depois ba vizita tiha fatin plantasaun baunilha iha pensamentu ida hanesan ne´e, se karik iha suku balun mak iha produktu ida hanesan ne´e entaun ita bele diminui ona maneira ida ne´ebe dependêcia ba governu, tanba ita bo´ot sira halo uluk tiha foin mak husu ba governu, ida ne´e mak merese duni governu tenki tau matan, tanba kontribui ba receita estadu liu husi produktu ne´ebe empresa sosa no haruka sai tenki selu taxa ba estadu.

Alende ne´e membrus komisaun D, liu husi deputadu Antoninho Bianco lori komisaun nia naran agradese, apresia no louva tebes saída mak suku ida ne´e halo liu husi plantasaun produktu baunilha halo suku ida ne´e naran morin liu iha Timor Leste no mos iha mundu. Afinal ita buka osan la presiza ba iha Inglaterra no nasaun sira seluk, maibe ita nia rai ne´e fo hela fatin mai ita atu buka osan, tanba ne´e los duni estadu iha dever hodi valoriza, tanba ita bo´ot sira hatudu ona sentimentu pertence ba buat ne´ebe mak ita bo´ot sira hatudu. Dever atu hamorin nasaun ida ne´e liu husi buat ki´ik ne´ebe mak ita bo´ot sira halo no kestiona, no bele dehan katak ho iniciativa husi señor Baltazar Martins no señor Celestino Mascarinhas ne´e konsidera hanesan herói kikoan ida atu hamorin Timor Leste liu husi buat ne´ebe mak imi halo ona ne´e, tanba ne´e merese duni iha valorizasaun ba ita bo´ot sira.

## KOMISAUN EKONOMIA NO DEZENVOLVIMENTU

---



*Enkontru ho autoridade lokal no komunidade sira iha sede suku Leimea Sorin Balu*

### IV. VIZITA TERENU

#### 41. Vizita Fatin Plantasaun Baunilha

Iha vizita ne'e alende observa, iha mos husu no hatan entre deputadu sira ho agrikultor sira, liu-liu kona ba preprasaun, plantasaun, manutaensaun, prosesu fo kaben, kolheta no to'o hetan rezultadu hodi fan ba empresa. Teknikamente distansia kuda baunilha entre stek ida ba stek seluk ho distansia metru rua kuadrado, hafoin moris mak halo manutensaun hodi tau adubu sira ba nia hun. Adubu ne'ebe presiza hanesan karau ten, dut maran no seluk tan. Baunilha presiza ai mahon no ai sadere hodi nani tuir ai lolon atu nune'e bele movimenta tuir kondisaun no karakter ai horis ne'e nian. Ai horis ne'ebe mak iha hanesan ai gamal ho ai fau. Iha tempu udan la presiza rega maibe iha tempu bailoron tenki rega. Kuandu funan depende ba udan para. Udan mak para iha fulan abril entaun nia fo funan, se udan to'o iha fulan julhu entaun fulan agostu hanesan ne'e mak foin funan. Prosesu atu fo kaben ne'e depende ba nia funan no iha tempu ne'ebe mak udan para. Rezultadu depende ba nia fini/stek, fini/stek badak entaun tinan tolu mak foin kolheta, se fini/stek naruk tinan rua deit bele kolhete ona. Baunilha sai hanesan ai produktu foun ida ne'ebe agrikultor barak mak seidak konhese ho diak tanba nia produsaun garante kresimentu ekonomia sustentavel iha futuro, tanba ne'e presiza dezenvolve liu husi expansaun iha area potencia foun iha Timor Leste tuir karakter plantasaun no klima ne'ebe tropical.

Kona ba prosesu preparasaun terenu no plantasaun antes ne'e Ministeu Agrikultura no Peskas, liu husi Diresaun Plantas no Industria mak akompania hodi fo apoiu tekniku, depois ida ne'e agrikultor sira mak

## KOMISAUN EKONOMIA NO DEZENVOLVIMENTU

---

implementa rasik tanba sira iha ona experiensia ne'ebe naton. Agrikultor sira haktuir katak sira nia parte prontu ho tekniku ne'ebe sira iha bele halo rai ne'ebe krekas sai bukur no rai ne'ebe foho lolon sira bele halo terasering, maibe difikuldade ne'ebe sira infrenta mak falta be'e. Be'e ne'ebe utiliza hodi rega baunilha iha tempu bailoron sira utiliza mota bo'ot rua hanesan mota Kibata no mota Limea Leten. Distansia husi mota rua ne'e mai iha fatin plantasaun husi kilometru ida ba to'o kilometru rua ho balu, maibe to'o agora seidauk iha entidade ruma mak apoiu atu kanaliza be'e no durante ne'e agrikultor sira mak esforsu rasik dada be'e hodi rega baunilha.

Prosesu fo kaben ba baunilha, hare ba iha nia funan kuandu funan sai ona tenki fo kaben kedas, se lae la iha rezultadu. Hafoin fo kaben tiha liu loron rua ba hare funan ne'ebe fo kaben ne'e lamonu signifika iha rezultadu, se la konsege mak liu loron ne'ebe ba hare ne'e funan ne'ebe fo kaben ne'e monu tiha, entaun ne'e la iha rezultadu. Durasau tempu fo kaben depende ba funan ne'ebe iha no kuantidade, kuandu barak bele to'o fulan tolu hanesan ne'e, maibe tenki fo kaben dala ida.

Rezultadu kolheta, iha tinan rua tutuir malu entre 2018 no 2019 husi total 15 hektares ba ema hamutuk 125 no osan ne'ebe hetan hamutuk \$200 mil resin dolar amerikanu no hela 8 hekatres foin mak hahu kuda.

Agrikultor sira mos haktuir liu tan katak wainhira be'e iha, ba oin sira sei halo expasaun liu tan no mos bele loke kampu trabalhu, tanba atu fo kaben ne'e mos presiza ema no ema ne'ebe mak iha paciência, no iha prosesu fo kaben ne'e tenki ema liman diak no kuidadu atu nune'e labele estraga.

Iha parte seluk, agrikultor sira haktuir katak kompara kafe ho baunilha, sira nia parte hili baunilha mak diak liu mesmu ke servisu ladun todan maibe rezultadu ne'ebe hetan barak, maibe kafe servisu kolen liu no nia rezultadu ne'ebe hetan oitoan tebes.

Husi total plantasaun 23 hektares no 21 hektares mak naran rejistu iha grupu no hetan apoiu husi governu no restu seidauk registradu. Apoiu ne'ebe governu fo la hanesan ba iha kada agrikultor sira, hare ba plantasaun, ne'ebe mak bo'ot hetan apoiu \$30 - \$50 dolar amerikanu no plantasaun ne'ebe ki'ik hetan apoiu \$20 - \$25 dolar amerikanu. Osan ne'ebe sira hetan ne'e hodi sosa material hanesan pregu hodi halo lutu haleu plantasaun baunilha.



## KOMISAUN EKONOMIA NO DEZENVOLVIMENTU

---

Sira hato´o mos sira nia preokupasaun importante mak hanesan: be´e la to´o ba fatin plantasaun hotu; prosesa hodi hetan kualidade iha merkadu nacional ka internasional. Ida ne´e mak sira husu ba futuru tenki estabelese sentru procesamentu ba kualidade; presiza difini presu fini/stek baunilha. Alende ne´e mos sira husu atu governu buka tan empresa balu atu bele kompete ho empresa NCBA/CCT hodi sosa produktu baunilha.

Rezultadu kolheta baunilha no fan ba iha merkadu, liu husi empresa NCBA/CCT desde 2008. Rezultadu produsaun kada tinan aumenta no iha tinan 2019 mak produsaun tun tanba impaktu husi bailoron ne´ebe naruk.



*Delegasaun vizita fatin plantasaun baunilha*

### 4.2. Vizita Estatua Cristo Liurai Cailit Lau

Depois konklui tiha vizita iha suku Leimea Sorin Balu, postu administrativu Hatolia, delegasaun komisaun D kontinua ba vizita Estatua Cristo Liurai Cailit Lau. Estatua Cristo Liurai Cailit Lau ne´ebe lokaliza iha suku Dukurai, postu administrativu Letefoho. Inesiativa hari´i Estatua Cristo Liurai mai husi Pe. Domingos Soares ``Maubere`` hamutuk ho leigu no sarani sira. Orsamentu ne´ebe gasta ba obra ne´e mai husi igreja rasik, kontribui mos husi sarani sira, inklui Letefoho oan sira ne´ebe servisu iha estranjeiru no servisu iha rai laran.


Fatin ne´e nudar fatin orasaun nian ba ema sarani kotolika sira, maibe iha parte seluk mos konsidera hanesan fatin turismo religiosa ne´ebe atrai turista sira husi rai liur no rai laran hodi ba vizita.

*Relatoriu Vizita Fiskalzasau Komisaun D, iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera*

## KOMISAUN EKONOMIA NO DEZENVOLVIMENTU

Tuir observasaun katak fatin ne'e estratejiku tebes, maibe presiza kria kondisaun básiica sira ne'ebe mak bele atrai liu tan turista sira hodi ba vizita hanesan saneamentu, haris fatin, restaurante no estrada ne'ebe ke'e ona ba, maibe presiza melhora liu tan.

Tuir informasaun ne'ebe hato'o husi responsável ba iha fatin neba katak durante ne'e vizitante sira ne'ebe ba vizita sei gratuita hela no tuir planu ba oin autoridade postu administrativu sei tur hamutuk ho autoridade igreja hodi kria kondisaun balun atu nune'e bele hetan reseita ruma husi vizitante sira ne'ebe ba vizita.



*Delegasaun ba vizita Estatua Cristo Liurai Cailit Lau*

## V. KONKLUZASAUN NO REKOMENDASAUN

### 5.1. Konkluzsaun

- a) Produitu baunilha hahu tama iha suku Leimea Sorin Balu iha tinan 2004, ne'ebe hahu kuda la to'o hektare ida, maibe depois ida ne'e hare katak rai ne'e serve duni ba kuda produitu baunilha no mos hare ba valor ekonomiku iha merkadu aumenta ba beibeik, ho nune'e ikus mai influensia ba

## KOMISAUN EKONOMIA NO DEZENVOLVIMENTU

---

komunidade sira seluk hodi kontinua kuda no haluan tan área plantasaun mai to'ó ohin loron liu ona hektares 23;

- b) Empresa ne'ebe mak kada tinan sosa produktu baunilha mak empresa NCBA/CCT ho folin kada kilograma \$40-\$50 dolar amerikanu;
- c) Plantasaun baunilha kada tinan aumenta ba beibeik, maibe problema ne'ebe agrikultor sira infrenta mak be'e, liu-liu iha tempu bailoron naruk, nune'e mos presiza kria sentru viveiros no sentru processamentu hodi bele hatene kona ba qualidade husi produktu baunilha, inklui difini presu ba kada fini/stek;
- d) Estatua Cristo Liurai Cailit Lau ne'ebe konsidera mos nudar fatin turismo religiosa, tanba ne'e presiza kria kondisaun básica sira ne'ebe mak bele atrai liu tan turista sira hodi ba vizita hanesan saneamentu, haris fatin, restaurante no estrada ne'ebe ke'e ona maibe presiza melhora liu tan.

### 5.2. Rekomendasaun

- a) Rekomenda ba Ministeriu Agrikultura no Peskas ba oin buka tan empresa balun atu kompete ho empresa NCBA/CCT hodi sosa produktu baunilha, tanba durante ne'e empresa NCBA/CCT deit mak sosa;
- b) Rekomenda ba Ministeriu Agrikultura no Peskas atu difini presu ba fini/stek baunilha, inklui husi estabese sentru viveiros no sentru processamento kona ba qualidade produktu baunilha;
- c) Rekomenda ba Ministeriu Administrasaun Estatal, liu husi programa PNDS atu bele apoiu kanalizasaun be'e, inklui konstrui ho tanke be'e iha suku Leimea Sorin Balu hodi nune'e bele responde iha tempu bailoron naruk, liu-liu hodi utiliza ba rega produktu baunilha no mos produktu seluk tan;
- d) Rekomenda ba Ministeriu Turismo, Komersiu no Indústria atu tau iha planu orsamentu hodi konstrui no hadia kondisaun básica sira ne'ebe mak bele atrai liu tan turista sira hodi ba vizita Estatua Cristo Liurai Cailit Lau hanesan saneamentu, haris fatin, restaurante no estrada.

## VI. APROVASAUN

Relatório ne'e, hetan ona aprovasaun liu husi reuniaun ordinariu komisaun nian ne'ebé realiza iha loron quarta-feira, 19 fevereiru 2020, tuku 10h00, Oras Timor Lorosa'e, iha sala komisaun D Parlamentu Nasional. Prosesu aprovasaun hetan partisipasaun husi membrus komisaun nain 7 ho

## **KOMISAUN EKONOMIA NO DEZENVOLVIMENTU**

---

rezultadu aprovasaun a favor 7 kontra 0 no abtensaun 0. Ho nune´e relatoriu vizita fiskalizaun ba iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera aprovalu ho unanimidade.

### **VII. LIAN IKUS**

Ida ne'e mak relatóriu vizita fiskalizaun Komisaun Ekonomia no Dezenvolvimentu iha iha Suku Leimea Sorin Balu, Postu Administrativu Hatolia no Suku Dukurai Postu Administrativu Letefoho, Munisipiu Ermera no husu autoridade kompetente atu konsidera relatóriu ne'e.

Obrigadu.

Prezidente Komisaun,

Relatora,

**Deputada Virgínia Ana Belo**

**Deputada Olinda Guterres**